

Hmong - Vaajtsvv Ntawv - Spiritual Warfare Intro Scriptures

Luka 17:5 Cov tubkhai has tsua Yexu has tas, thov koj paab kuas peb muab tsua sau sab ntseeg heev.

Loo 10:17 Ua le hov mas yuav yog tau nov txha paub ntseeg, hab yuav yog muaj tug moog pav Yexu Kheto txuj xuv zoo, mas txha tau nov.

Luka 11:1 Muaj ib zag Yexu saamswm thov Vaajtsvv ntawm ib qhov chaw.
Thaus nwg thov taag, tes nwg ib tug thwjtum txawm has tsua nwg has tas, tug tswv, thov koj qha kuas peb paub thov Vaajtsvv, ib yaam le kws Yauhaa tau qha tsua Yauhaa cov thwjtum lawm.

1 Timaute 2:1-4 Qhov tseem ceeb kws kuv xaav kuas mej ua yog le nuav, mej yuav tsum thov Vaajtsvv paab suavdawg hab mej yuav tsum ua Vaajtsvv tsaug. 2 Kuv thov mej thov Vaajtsvv paab cov vaaj ntxwv hab cov num tswv. Yog peb ua le ntawm peb yuav tau nyob kaaj sab quas lug ua Vaajtsvv teg num, hab tau zoo ua peb lub neej kuas phim qhov kws peb yog cov ntseeg. 3 Qhov nuav yog qhov zoo hab hum Vaajtsvv kws yog peb tug Cawmseej lub sab. 4 Vaajtsvv xaav kuas tej tuabneeg suavdawg nyag dim nyag lub txem, hab xaav kuas puab paub qhov tseeb.

Xakhaliya 3:1 - Luka 22:31 Yexu has tas, Ximoo, Ximoo, koj ua tuab zoo noog kuv has. Vaajtsvv tub ca Daab Ntxwg Nyoog lug swm mej txhua tug lub sab lawm, ib yaam le tug yaaj nplej muab vaab ntxuaj cov npluag nplej yaa moog.

Xakhaliya 3:2 - Yuta 1:9 Mikhayee tub yog cov tubkhai sau ntuj tug thawj los nwg tub tsw ua le ntawm. Thaus nwg nrug Daab Ntxwg Nyoog svs caav has txug Mauxe lub cev has tas, leejtwg yuav tau, Mikhayee tub tsw has lug sab tsua Daab Ntxwg Nyoog le. Nwg tsuas has tas, Vaajtsvv yog tug kws yuav tshev koj.

Efexau 6:12 Tsua qhov tsw yog peb tawm tsaam tuabneeg, kuas yog peb tawm tsaam tej daab kws nyob sau nruab ntug, tsw has cov thawj los yog, tej kws muaj fwjchim los yog, tej fwjchim kws kaav tam tsaus ntuj nuav los yog, peb tawm tsaam huvsw.

Efexau 6:10,11 Thaus kawg nuav kuv qha mej has tas, mej yuav tsum nrug Vaajtsvv svs raug zoo mej txha le muaj zug, hab tau nwg tug fwjchim kws luj kawg nkaus. 11 Mej yuav tsum muab tej cuab yeej kws Vaajtsvv pub tsua mej lawm huvsw lug naav. Yog mej ua le ntawm, thaus Daab Ntxwg Nyoog tuaj ntxag mej, mej txha le kov yeej.

Efexau 6:13-17 Yog le ntawm, nwgnuav mej yuav tsum muab Vaajtsvv tej cuab yeej lug naav. Yog mej ua le ntawm, thaus Daab Ntxwg Nyoog tuaj tawm tsaam mej, mej txha kov yeej. Hab thaus tej kev tawm tsaam

ntawm dhau lawm, mej txha nyob tau ruaj nreeg. 14 Yog le ntawm mej yuav tsum npaaj tog. Ca le muab txujlug tseeb lug ua hlaab sa, muab kev ncaaj nceeg lug ua daim hlau thaiv hauv sab. 15 Hab mej yuav tsum muab lub sab kub quas lug kws moog qha txuj xuv zoo kws has tas, Vaajtsvv tub qheb kev tsua tuabneeg moog cuag Vaajtsvv lawm, lug ua khau rau. 16 Mej yuav tsum naj nub tuav kev ntseeg thaiv mej ib yaam le mej tuav daim hlau thaiv. Yog mej ua le hov mej yuav tua tau Daab Ntxwg Nyoog raab xub suav tawg kws nwg tua tuaj. 17 Ca le muab txujkev dim txem kws Vaajtsvv pub tsua mej lawm coj lug ua mom hlau ntoo. Hab muab Vaajtsvv txujlug kws Vaajtsvv tug Ntsuj Plig pub tsua mej, coj lug ua ntaaj tuav.

Heplais 4:12 Tsua qhov Vaajtsvv tej lug muaj sa hab tseem ceeb muaj kuab kawg le. Tej lug ntawm ntse dua raab ntaaj kws ob saab ntse, nkaug moog txug nruab sab nruab plaw, hab nkaug txug huv tej hlwb txhaa. Tej lug ntawm tshuaj tej kws tuabneeg xaav hab paub tuabneeg lub sab huvsw.

Luka 4:8 Yexu teb has tas, tub muaj lug sau ca tsua huv Vaajtsvv phoo ntawv has tas, koj yuav tsum pe Yawmsaub kws yog koj tug Vaajtsvv hab ua Vaajtsvv tuab leeg teg num xwb.

Efexau 6:18 Ib puas tsaav yaam kws mej ua nuav, mej yuav tsum thov Vaajtsvv paab hab. Mej yuav tsum thov Vaajtsvv txhua lub swmhawm lawv le kws Vaajtsvv tug Ntsuj Plig coj mej. Vem le ntawm mej yuav tsum ua sab ntev thov Vaajtsvv tsw xob nkeeg. Hab naj nub thov Vaajtsvv paab cov ntseeg suav-dawg.

1 Xamuyee 17:45-47 Tavi teb tas koj coj muv coj ntaaj hab coj muv vug tuaj tawm tsaam kuv, kuas kuv tuav Yawmsaub kws muaj fwjchim luj kawg nkaus kws yog cov Yixayee tej tub rog tug Vaajtsvv kws koj saib tsw taug nuav lub npe tuaj tawm tsaam koj. 46 Nub nua Yawmsaub yuav muab koj cob tsua kuv txhais teg, kuv yuav tua yeej koj hab yuav txav koj cej daab. Kuv yuav muab cov Falixatee tej tub rog lub cev tsua noog hab tsaj noj. Thaus muaj le hov lawm tuabneeg thoob nplajteb txha paub tas Vaajtsvv nrug nraim cov Yixayee nyob. 47 Txhua leej kws nyob ntawm nuav puav leej yuav pum tas tsw taag Yawmsaub yuav swv ntaaj swv muv txha paab tau nwg haiv tuabneeg dim. Zag rog nuav Yawmsaub yuav kov yeej mej hab nwg yuav muab mej txhua leej cob tsua huv peb txhais teg.

Luka 10:17-20 Thaus xyaa caum ob leeg thwjtima rov qaab lug cuag Yexu, puab zoo sab kawg, puab has tsua Yexu has tas, xwbfwb, thaus peb tuav koj lub npe ntab daab, daab kuj noog peb lug hab. 18 Yexu has tsua puab has tas, kuv pum Ntxwg Nyoog poob sau ntuj lug ib yaam le tsag lig xub. 19 Mej ua tuab zoo noog, kuv tub pub fwjchim tsua mej lawm, mej yuav tsuj tau naab hab raub rws teb, hab mej yuav muaj fwjchim kov yeej

Daab Ntxwg Nyoog, hab yuav tsw muaj ib yaam daabtsw ua tsua mej txom nyem. 20 Mej tsw xob zoo zoo sab tsua qhov nyuas kws daab noog mej lug ntawm, kuas mej yuav tsum zoo sab tsua qhov kws tub sau mej tej npe ca tsua sau ntuj ceeb tsheej lawm.

2 Kauleethau 10:3-5 Peb yeej nyob huv nplajteb nuav tag. Kuas peb tsw tawm tsaam le tuabneeg ib txwm tawm tsaam. 4 Thaus peb tawm tsaam yeeb ncuab peb tsw swv tej cuab yeej kws tuabneeg ib txwm swv, kuas peb swv tej cuab yeej kws Vaajtswv kws muaj fwjchim muab tsua peb, peb txha tsoo tau yeeb ncuab lub loog kuas puam tsuaj taag huvsw. Peb tshev tej tuabneeg kws qha tsw tseeb kuas puab tsw muaj lug teb. 5 Peb rhuav tej kws tuabneeg muab lug thaiv tsw kheev suavdawg paub Vaajtswv, hab peb coj cov tuabneeg kws ua yeeb ncuab tsua Vaajtswv lug ua Yexu Kheto qhev kuas puab noog nwg lug.

2 Timaute 1:7 Tsua qhov Vaajtswv tug Ntsuj Plig kws Vaajtswv pub tsua peb, nwg yeej xaav kuas peb muaj sab tuab. Nwg yuav ua num tsua huv peb lub sab kuas peb muaj fwjchim, muaj sab hlub lwm tug hab kuas peb paub tswj peb lub sab.

Mathai 12:28,29 Tsw yog le mej has, Vaajtswv tug Ntsuj Plig pub fwjchim tsua kuv, kuv txha ntab tau daab, mas qhov nuav ua tsua mej paub tseeb has tas, tub txug lub swmhawm kws Vaajtswv lug kaav mej lawm. 29 Yog muaj ib tug quasyawg muaj muaj zug nwg nyob huv nwg tsev, yeej tsw muaj leejtwg yuav moog lws tau tug hov tej hov txhua chaw, yuav yog xub muab tug muaj zug ntawm khi tsav txha le lws tau tej hov txhua chaw huv tug ntawm tsev.

Efexau 1:13 Mej cov los kuj zoo ib yaam nkaus le peb hab. Thaus mej nov txuj xuv zoo tseeb kws paab tau kuas mej dim mej lub txem, mej txha ntseeg Yexu Kheto. Vaajtswv pub Vaajtswv tug Ntsuj Plig tsua mej lawv le Vaajtswv tau cog lug tseg lawm. Tug Ntsuj Plig ntawm yog lub hom thawj kws Vaajtswv nas tsua mej. Vaajtswv ua le hov mas qha kuas mej paub has tas, mej yog Vaajtswv le tuabneeg lawm.

Cov Tubkhai Teg Num 19:6 Thaus Povlauj tsaa teg npuab puab es thov Vaajtswv, tes Vaajtswv tug Ntsuj Plig txawm lug nyob huv puab txhua tug lub sab. Puab has- lug txawv txawv hab puab qha Vaajtswv txujlug.

Malakau 16:15-18 Yexu qha cov thwjtum has tas, mej yuav tsum moog qha txuj xuv zoo thoob plawg huv nplajteb nuav tsua suavdawg nov. 16 Tug kws ntseeg hab ua kevcai raus dej mas yuav dim, kuas tug kws tsw ntseeg yuav raug txem. 17 Cov kws ntseeg, puab yuav muaj fwjchim ua tej txujci tseem ceeb. Thaus puab tuav kuv lub npe ntab daab, daab yuav tawm, puab yuav txawj has tej lug txawv txawv, 18 yog puab ntsab tau naab, naab yuav tsw tum puab, yog puab haus tau tshuaj lom los yuav tsw ua le caag tsua puab, yog puab cev teg npuab cov tuabneeg muaj mob, tes cov tuabneeg hov yuav zoo.

1 Yauhaa 1:9 Kuas Vaajtsvv yog tug kws ncaaj nceeg peb txha tso sab tau has tas, yog peb leeg txem tsua Vaajtsvv tes Vaajtsvv yuav daws peb lub txem hab ntxuav peb tej kev txhum huvsw moog.

Tswv Dim 20:5 Mej tsw xob pe ib tug txoov daab twg hlo le, tsua qhov kuv yog Yawmsaub kws yog mej tug Vaajtsvv kws khib xeeb mej. Kuv yog tug kws rau txem tsua cov tuabneeg kws ntxub kuv, hab rau tsua puab tej xeeb ntxwv moog txug peb plaub tam tuabneeg.

Ntawv Nkauj 109:17 - Yakaupau 3:10 Lu lug kws ua Vaajtsvv tsaug hab lu lug tshev puav leej yog tug nplaig has. Cov kwvtij, tsw tswm nyog yuav muaj le ntawm. 11 Dej qaab hab dej ab yeej tsw txhawv huv tuab lub qhov dej lug ib zag le.

Cov Thawj 16:16 Telila pheej naj nub nug le nuav ua tsua Xaxoo dhuav kawg le hab tsw xaav ua neej nyob lawm, tsua qhov Telila pheej txob Xaxoo heev.

Efexau 4:26 Yog thaus twg mej chim, mej tsw xob kheev qhov kws mej chim ntawm ua tsua mej ua txhum, hab tsw xob chim taag nub.

Loo 14:12 Yog le ntawm peb txhua tug nyag yuav tsum qha nyag teg num tsua Vaajtsvv.

1 Yauhaa 2:23 Tug kws ntseeg leej tub kuj yog nwg ntseeg leej txww lawm hab.

Yauhaa 14:6 Yexu teb has tas, kuv yog txujkev ntawm, kuv yog qhov tseeb hab yog txuja, tsw muaj leejtwg yuav moog cuag tau leej txww tsuas yog lug ntawm kuv moog xwb txha tau.

Mathai 11:28-30 Mej cov kws rws nraa nyaav es saab saab, mej ca le lug cuag kuv, kuv yuav ca mej tau su lug sav. 29 Kuv yog tug kws sab dawb sab zoo, mej ca le lug kwv kuv tug ntaas kws yaam le nyuj hai tsheb, hab kawm tej kws kuv qha, mej txha le tau su. 30 Tug ntaas kws kuv muab tsua mej kwv yoojyim kwv, hab lub nraa kws kuv muab tsua mej rws kuj tsw nyaav.

2 Kauleethau 6:2 Mej yuav tsum noog tej lug kws Vaajtsvv has tas, Lub swmhawm kws txaus kuv sab mas kuv zoo sab noog mej thov. Nub kws mej dim yog kuv paab mej. Mej ua tuab zoo noog kuv tej lug. Lub swmhawm nuav yog lub swmhawm kws Vaajtsvv pum zoo paab mej. Nub nua yog nub kws mej yuav dim tau mej lub txem.

Loo 10:13 Zaaj nuav yeej lawv le tej lug kws sau ca tsua huv Vaajtsvv phoo ntawv has tas, txhua tug kws thov Vaajtsvv cawm mas yuav dim, hab Vaajtsvv yuav pub lub sab tshab tsua.